



**Bank of Botswana**

22 Lwetse 2025

## **PEGO YA BOBEGADIKGANG**

**Ba S&P Global Ratings (S&P) ba fetotse seelo sa boleng jwa lefatshe la Botswana mo go tsa kadimo ya madi a a duelwang mo lobakeng le le leele, fa jwa kadimo ya madi a a duelwang mo lobakeng le le khutshwane le tebelopele ya itsholelo ee bokoa bo sa fetoga**

Batlhatlhabi ba boleng jwa mafatshe mo go tsa kadimo ya madi (sovereign credit rating agency), e bong S&P, ba ntshitse maduo, morago ga go tlatlhoba boleng jwa lefatshe la Botswana.

Maduo a supa fa boleng jwa lefatshe la Botswana mo go tsa kadimo ya madi a a duelwang morago ga lobaka le le leele bo ile ko tlase (go tswa ko go BBB+ go ya ko go BBB), ntswa boleng jwa kadimo ya madi a a duelwang morago ga lobaka le le khutshwane bo sa fetoga (A-2). Le fa go ntse jalo, lefatshe la Botswana le santse le le mo maamong a mantle mo go tsa dipeeletso (Investment Grade).

Badupi ba S&P ba begile fa phetogo ya boleng e bakwa ke ponelopele ya go wela tlase ga letseno la Puso, le le ntseng le ikaegile ka bokete mo thekisong ya diteemane, tse theko le tlhwatlhwa ya tsone mo mebarakeng ya mafatshefatshe e tlaa tswelelang e le bokoa go ya pele. Ka jalo, se se bake phokotsego ya seemo sa madi sa Puso le go e ketefalesa go kgona go emelana le dikgwetho tse di ka tlhagang go ya pele.

Le fa maduo a supa phokotsego ya boleng, go na le dintlha tse di itumedisang ka lefatshe la Botswana. Tse di akaretsa, kelotlhoko mo tirisong ya madi a sechaba ga Puso; sekoloto sa Puso se se ko tlase, le fa ntswa se oketsega; makala le methale ya tsamaiso ya itsholelo a a nitameng; le go neelana puso ka kagiso morago ga ditlhopho tsa ngogola ka Phalane. Mabaka a mangwe a akaretsa maitlamo a Puso go kabakanya itsholelo, le go diragatsa mananeo a go tokafatsa itshetso mo Batswaneng. Ba S&P ba re ba solofela fa tumelano

magareng ga lefatshe la Botswana le kompone ya diteemane ya De Beers e tlaa thusa go baakanya seemo se se wetseng tlase sa mohama wa diteemane mo lefatsheng leno.

Go ya pele, ba S&P ba supile fa maduo a boleng a ka tsholetsega fa ditlhwatlhwa le theko ya diteemane di ka tokafala, mme se sa oketsa letseno la Puso le fa maiteko a a dirwang ke Puso a go kabakanya itsholelo a ka atlega, ka gore go dira jalo go ka fokotsa go ikaega ka diteemane. Le mororo go ntse jalo, ba S&P ba supile fa maduo a ka wela tlase fa tse di sa diragale.

Ditshhekatsheko di tswelela di supa fa go le botlhokwa go tthomamisa gore mananeo a ditogamaano tsa ditlhabololo (National Development Plans le la Botswana Economic Transformation Programme, le le ribolotsweng mo bosheng) a diragadiwa ka botlalo mo nakong e e beilweng, le ka madi a a dumalanweng; go kabakanya le go godisa itsholelo; go oketsa letsena la puso; ga mmogo le go lebelela thata boleng le botlhokwa jwa tiriso ya madi a puso.

**Go itse go feta fa, o ka ikgolaganya le Banka ya Botswana, ka go leletsa , Dr. Seamogano Mosanako. Head of Communications and Information Services, at mosanakos@bob.bw or telephone at +267 360 6083 or 360 6382 or +267 360 6315 or [www.bankofbotswana.bw](http://www.bankofbotswana.bw)**